

Sphex (Chlbrion) semenowi (F. Moraw 1890) ♂ nondum descriptus (Hymenoptera, Crabronidae).

Auctore

Andrea Semenow, petropolitano.

Differt a femina ¹⁾ staturâ graciliore, capite multo minore, imprimis angustiore, unâcum oculis latitudinem thoracis nullo modo superante, pone oculos haud ampliato, temporibus multo brevioribus genas versus fortissime angustatis, sensim fere evanescentibus, clypeo apice subproducto dentibus tribus triangularibus, invicem prorsus aequalibus armato, vertice confertissime minute punctulato-alutaceo, opaco, lineâ longitudinali multo breviori signato, fronte crebre rugoso-punctatâ, occipite temporibusque infra multo copiosius et longius nigro-pilosis; antennis longioribus, fortioribus, apicem versus sensim attenuatis, articulis 4^o—13^o superne valde obscuratis acuteque longitudinaliter bi-vel tricarinulatis, 4^o tertio subaequilongo, 5^o praecedente vix brevior, sequentibus longitudine sensim pauloque decrescen-
tibus; collari majore ex parte nigro, pronoto paulo copiosius nigro-piloso, mesonoti dorso confertim minutissime punctulato, subopaco, praeterea antice punctis majoribus pilos rigidos

¹⁾ Cf. F. Morawitz: Horae Soc. Ent. Ross., XXXIV, 1890, p. 570.

nigros gerentibus sat copiose, etsi sparsim obsito; scutello convexiusculo, retrorsum nonnihil declivi, minus nitido, microscopice vix perspicue punctulato sulcoque longitudinali parum impresso diviso; mesopleuris sternoque toto copiosius punctatis pilisque rigidis nigris abunde obsitis. Ceteris notis (praeter structuram abdominis) coloreque cum ♀ consentaneus.

Long. ♂ 25, alae super. 18 mm.

Haec species a *Sph. regali* Smith (*superbo* Rad.), cui proxima est, argute differt, a *Sph. magnifico* F. Mor. magis adeo distat.

Descriptio e specimine transcaspico, sine certiore indicatione originis a C. Ahnger Museo Zoologico Acad. Caes. Scient. Petrop. donato, *olim* concepta.
